



NEWSLETTER

OLIMPIJSKOG KOMITETA BIH

No. 34, januar/februar 2026



Poštovane sportistkinje i sportisti,
Poštovani prijatelji,

Zadovoljstvo mi je pozdraviti vas u 34. izdanju Newsletter-a Olimpijskog komiteta Bosne i Hercegovine.

U ovim izazovnim, ali i izuzetno ponosnim trenucima, želim posebno istaći istorijski uspjeh Olimpijskog tima Bosne i Hercegovine na XXV Zimskim olimpijskim igrama Milano Cortina 2026! Iako u uslovima skromnih budžeta, nedovoljne infrastrukture i često složenog institucionalnog ambijenta, naši olimpijci, najbolji ambasadori Bosne i Hercegovine ostvarili su izuzetne rezultate na čemu im još jednom čestitamo! Vrijeme je da kao društvo

prepoznamo vrijednost ovakvih rezultata i osiguramo sistemsku podršku koja će omogućiti još veće domete u budućnosti.

Vjerujemo da će uspješan početak godine koji su obilježili olimpijci ZOI 2026 biti nastavljen i na naredna dva međunarodna višesportska takmičenja u 2026. godini – Mediteranskim igrama Taranto 2026 i Olimpijskim igrama mladih Dakar 2026.

Period iza nas obilježile su i aktivnosti sportskih saveza BiH, rezultati naših reprezentativaca, kao i aktivnosti Olimpijskog komiteta Bosne i Hercegovine, o čemu možete pročitati na narednim stranicama.

Hvala svima koji kroz rad, volonterski angažman ili podršku doprinose razvoju sporta u našoj zemlji. Nastavimo zajedno graditi sistem koji prepoznaje i podržava talente od najranijih dana do svjetskih pozornica.

Brže, više, jače – zajedno!

S poštovanjem,

Akademik prof. dr. Izet Rađo
Predsjednik Olimpijskog komiteta Bosne i Hercegovine

BH TELECOM I OLIMPIJSKI KOMITET BOSNE I HERCEGOVINE NASTAVLJAJU VIŠEDECENIJSKU SARADNJU



Generalni direktor BH Telecom-a gosp. Amel Kovačević ugostio je na radnom sastanku predstavnike Olimpijskog komiteta Bosne i Hercegovine predsjednika akademika Rađo Izeta i generalnog sekretara dr sci. Fazlagić Saida. Tema sastanka je bio nastavak višedecenijske uspješne saradnje OK BiH i BH Telecoma.

Kompanija BH Telecom je ponosni partner i sponzor Olimpijskog komiteta BiH, a njihova kontinuirana podrška i prisustvo, postali su neizostavni dio olimpijske porodice i Olimpijskog pokreta u BiH, te svake uspješne sportske aktivnosti.

BH Telecom prepoznao je u Olimpijskom komitetu BiH sportsku instituciju vrijednu i dostojnu strateškog partnerstva i saradnje i na tome je OK BiH zahvalan.

42. GODIŠNJICA OTVARANJA ZIMSKIH OLIMPIJSKIH IGARA SARAJEVO 1984

U februaru mjesecu obilježeno je 42 godine od održavanja XIV Zimskih olimpijskih igara održanih u Sarajevu 1984. godine.

Na Olimpijskom stadionu Koševo, 8. feburara tačno u 14:30h, počela je ceremonija otvaranja Zimskih olimpijskih igara Sarajevo 1984. U ime Organizatora prisutne su pozdravili predsjednik Organizacionog komiteta Branko Mikulić i predsjednik Međunarodnog olimpijskog komiteta Juan Antonio Samaranch. Igre je službeno otvorio predsjednik Predsjedništva SFRJ Mika Špiljak.



Plamen je zapalila klizačica Sanda Dubravčić, olimpijsku zakletvu u ime sportista položio je Bojan Križaj, a u ime sudija zakletvu je položio Sarajlija Miodrag Perović. U tim trenucima Sarajevo i Bosna i Hercegovina bile su fokus svijeta.

Prva zamisao o domaćinstvu ZOI potekla je davne 1964. godine od prof. Ljubiše Zečevića iz Sarajeva. Njegovu ideju podržali su Ahmed Karabegović i Braco Kosovec, a uz podršku Emerika Bluma i skicu arhitekta Brace Alikalfića, prof. Zečević je ideju prezentirao pred Međunarodnim olimpijskim komitetom u Lozani.

Kandidatura je formalno predana 30. decembra 1977. godine.

Na ZOI Sarajevo 1984. nastupilo je 1.272 sportista iz 49 zemalja u 39 disciplina. Među medaljama istaknuo se Jure Franko sa srebrom u veleslalomu, prva jugoslovenska medalja na Zimskim olimpijskim igrama. Ekipa SFRJ brojala je 72 člana, a iz Bosne i Hercegovine sudjelovali su biatlonci Tomislav Lopatić i Zoran Ćosić; brzoklizači Behrudin Merdović i Bibija Kerla; bobisti Boris Rađenović, Borislav Vujadinović, Mario Franić, Nikola Korica, Ognjen i Zoran Sokolović, Siniša Tubić i Zdravko Stojnić; te sankasji Dajana i Suad Karajica i Dušan Dragojević, koji je na Trebeviću ostvario najbolji rezultat bosanskohercegovačkog zimskog olimpijskog 16. mjesto. Igre su privukle 7.825 akreditiranih novinara i preko deset hiljada volontera. Zabilježeno je 206.000 noćenja u izletima i jednodnevnim aranžmanima za oko 40.000 gostiju.

Uz sve navedeno, Bosna i Hercegovina ima razloga biti ponosna na svoju olimpijsku ulogu, koju je nastavila i uspješnom organizacijom EYOF-a Sarajevo i Istočno Sarajevo 2019. Kompletan tekst pročitajte na linku [OVDJE](#).

ZOI MILANO CORTINA 2026

XXV Zimske olimpijske igre Milano Cortina 2026 su do sada najuspješnije ZOI za bh. Olimpijski tim. Bosnu i Hercegovinu je na Igrama predstavljalo pet sportista u alpskom skijanju i skijaškom trčanju.

Najbolji, istorijski rezultat ostvarila je Elvedina Muzaferija u disciplini super-veleslalom ostvarivši 16. mjesto od 43 takmičarke, zatim 20. mjesto u spustu od 36 sportistkinja, te 32. mjesto od 76 takmičarki u veleslalomu.

U muškoj konkurenciji najbolji rezultat je ostvario Marko Šljivić u slalomu plasmanom na 23. mjesto od 96 takmičara što je takođe istorijski rezultat u tehničkoj disciplini alpskog skijanja za Bosnu i Hercegovinu. U veleslalomu, Marko je ostvario poziciju na 39. mjesto od 81 takmičara.

Esma Alić je u slalom disciplini bila 36. od 95 takmičarki dok je u veleslalomu zauzela 52. poziciju od 76.

Nordijac Strahinja Erić se u disciplini 10km slobodnim stilom plasirao na 63. mjesto od 113 učesnika, dok je u sprintu bio 67. od 95 takmičara.

Teodora Delipara nažalost nije završila utrku u disciplini 10km slobodnim stilom.

26
MILANO CORTINA
2026

OLYMPIC COMMITTEE OF
BOSNIA AND HERZEGOVINA

BIH TEAM
WINTER OLYMPICS 2026
MILANO CORTINA

ESMA ALIĆ
ALPINE SKIING

STRAHINJA ERIĆ
CROSS COUNTRY

ELVEDINA MUZAFERIJA
ALPINE SKIING

MARKO ŠLJIVIĆ
ALPINE SKIING

TEODORA DELIPARA
CROSS COUNTRY

SPONZORI I PARTNERI OK BIH: bh, Moja priča, Coca-Cola, LUTRIJA BOSNE I HERCEGOVINE, NUMBER 1

Stručni dio bh. olimpijskog tima na XXV ZOI Milano Cortina 2026 su činili treneri: Mladen Plakalović, Dragan Jeftović, Nicola Quaquarelli, Edhem Bajrić, Faris Zuhrić i Željko Šljivić, kao i fizioterapeutkinja Petra Baumkircher, dok je šef misije bio dr sci. Said Fazlagić, generalni sekretar OK BiH.

Na Igrama su učestvovala 92 delegacije svijeta sa 2900 sportista.

FOTO SVEČANO PREDSTAVLJANJE BH. TIMA NA KONFERENCIJI ZA MEDIJE





Svečana ceremonija otvaranja je održana simultano na 4 mjesta (Milano, Cortina, Predazzo, Livigno zbog velike udaljenosti olimpijskih sela i rasporeda takmičenja. Naš tim je na ceremoniji otvaranja bio prisutan u Cortini i Livignu. Zastavu na ceremoniji su nosili Elvedina Muzaferija i Marko Šljivić.

ZAHVALNOST MINISTRICI DUBRAVKI BOŠNJAK NA KONTINUIRANOJ PODRŠCI OLIMPIJSKOM TIMU BOSNE I HERCEGOVINE



Ministrica civilnih poslova Bosne i Hercegovine, Dubravka Bošnjak kontinuirano pruža podršku našem olimpijskom timu. Ministrica je, nakon Ceremonije otvaranja, prisustvovala prvom nastupu bh. tima kada je najbolja bh. skijašica olimpijka Elvedina Muzaferija ostvarila najbolji plasman Bosne i Hercegovine u zimskim sportovima.

Olimpijski komitet Bosne i Hercegovine, treneri i sportisti cijene što je ministrica dio bh. olimpijskog puta, od Olimpijskih igara u Parizu do Zimskih olimpijskih igara Milano Cortina.

Podrška institucija sportistima Bosne i Hercegovine znači snagu, povjerenje i zajedništvo koje olimpizam nosi.



MILANO CORTINA 2026: USPJESI UPRKOS DRŽAVI, HOĆEMO LI KONAČNO IZGRADITI SISTEM ZA NAJBOLJE?

Nakon ZOI Milano Cortina 2026 ostaje jedna jasna i snažna istina: sportisti Bosne i Hercegovine još jednom su dokazali da talenat, rad i karakter postoje u ovoj zemlji. Ono što i dalje nedostaje jeste sistem koji ih prepoznaje, prati i strateški razvija.

Rezultati koje su ostvarili bh. olimpijci nisu plod stabilne sportske politike, dugoročne državne strategije niti uređenog modela finansiranja. Oni su rezultat lične žrtve, porodične podrške, predanosti trenera i entuzijazma malog broja ljudi koji vjeruju da je sport javno dobro, a ne protokolarna kategorija. U takvom ambijentu, uspjesi Lane, Elvedine, Tee, Anura, Marka, Strahinje i mnogih drugih nisu samo sportski rezultati – oni su čin dostojanstva. Oni su dokaz da vrhunski dometi mogu nastati i u uslovima institucionalne oskudice. Ali istovremeno, ti rezultati su i ozbiljna opomena.



Bosna i Hercegovina nema stabilan i predvidiv model finansiranja sporta, nema jasnu državnu strategiju razvoja sporta, nema sistemsku brigu o sportistima nakon karijere, niti jedinstven zakonodavni okvir koji sport prepoznaje kao strateški interes. Naši olimpijci ne uspijevaju zahvaljujući sistemu, nego uprkos njemu. U kontekstu Bosne i Hercegovine, gdje sistem često kasni za talentom, rezultati naših olimpijaca na ZOI Milano–Cortina moraju poslužiti kao kompas budućih reformi. Ako to ne učinimo, propuštamo istorijsku šansu. A najboljim mladim ljudima time političari šalju poruku da idu i potraže bolje mjesto kako bi ostvarili svoje snove.

Odgovorni za sport, od nadležnih ministarstava do političkih struktura, godinama tretiraju sport kao budžetski trošak, a ne kao investiciju u društveni kapital. Sport je često sveden na deklarativnu podršku i fotografije sa pobjednicima, bez suštinskih reformi i sistemskih rješenja. Takav odnos šalje opasnu poruku ne samo sportistima, nego i svim talentovanim mladim ljudima u zemlji: da sistem nije spreman stati iza izvrsnosti, da uspjeh zavisi isključivo od lične borbe, a ne od institucionalne podrške.

U svijetu u kojem druge države sistemski ulažu u sport, nude infrastrukturu, naučnu i medicinsku podršku, stipendije i profesionalne timove, Bosna i Hercegovina rizikuje da izgubi ono najvrednije – svoje najbolje ljude. Neulaganje u najbolje nije samo politička greška. To je etički problem.

Sportisti poput Lane, Elvedine, Tee, Anura, Marka, Strahinje i drugih ne traže privilegije. Oni traže fer uslove: infrastrukturu, stručnu podršku, zdravstvenu zaštitu, planiranu karijeru i sigurnu tranziciju nakon sporta. Traže sistem koji će pratiti njihov trud i poštovati njihovu žrtvu. Kada država to ne obezbijedi, a istovremeno koristi njihove uspjehe za kolektivni ponos, nastaje ozbiljna moralna disonanca. Ne možemo slaviti medalje, a ignorisati procese. Ne možemo aplaudirati rezultatima, a zanemarivati odgovornost.



Sport mora postati dio razvojne strategije Bosne i Hercegovine. Potrebna nam je dugoročna nacionalna strategija sporta, stabilan model finansiranja, profesionalizacija upravljanja, sistem dualnih karijera i jasni mehanizmi odgovornosti i dobrog upravljanja. Olimpijci nisu heroji improvizacije. Oni moraju biti rezultat sistema koji prepoznaje vrijednost izvrsnosti.

Ako uspjesi ostvareni u Milanu i Cortini ne pokrenu ozbiljne reforme, onda nismo razumjeli poruku koju su nam naši sportisti poslali sa staze, snijega i takmičarskih arena. I pored često nehumanog odnosa prema najboljima, oni ostaju, treniraju, bore se i postižu vrhunske rezultate. Njihovi uspjesi nisu samo sportski – oni su moralna lekcija društvu.

Bosna i Hercegovina ima potencijal. Ali potencijal bez sistema je rizik. Potencijal sa sistemom je budućnost.

Milano Cortina 2026. nam je dala priliku. Na političkom sistemu je da odluči hoće li je iskoristiti ili će i dalje kasniti za vlastitim talentom.

SPORTSKI SAVEZI BOSNE I HERCEGOVINE

BICIKLISTIČKI SAVEZ BIH | "TOUR OF BOSNIA AND HERZEGOVINA"



Uz snažnu podršku Olimpijskog komiteta Bosne i Hercegovine, 21. januara predstavljen je "Tour of Bosnia and Herzegovina".

U prisustvu mnogobrojnih medija, u Mostaru su predstavljeni ciljevi i značaj, te rute i timovi učesnika biciklističke trke "Tour of Bosnia and Herzegovina", koja će se održati u aprilu ove godine. Ovaj novi i strateški važan sportski projekat postavlja Bosnu i Hercegovinu na kartu profesionalnog svjetskog biciklizma, dok snažno promovira našu zemlju kao destinaciju sporta, turizma i međunarodne saradnje.

Prvo izdanje "Tour of Bosnia and Herzegovina" započinje 17. aprila, kada će karavan profesionalnih timova krenuti iz Sarajeva ka finalu na obali Jadranskog mora, u Neumu. Trka se sastoji od tri etape ukupne dužine 390 km i visinske razlike od 4.400m, povezujući unutrašnjost zemlje sa jedinim izlazom na more:

- Prva etapa: Sarajevo – Mostar (148 km, 1.370 m uspona)
- Druga etapa: Mostar – Ljubuški (122 km, 1.406 m uspona)
- Treća etapa: Ljubuški – Neum (118 km, 1.676 m uspona)

Na cilju će biti proglašen ukupni pobjednik i dodijeljene nagrade. Video prilog pogledajte na [OVOM LINKU](#).

RAGBI SAVEZ BIH | REPREZENTACIJA U18 POČELA PRIPREME ZA NAREDNE SUSRETE

Reprezentacija U18 Bosne i Hercegovine u ragbiju 15 i ragbiju 7 počela je pripreme za utakmice koje će odigrati u budućem periodu. Stručni štab U18 selekcije iskazuje optimizam i povjerenje u mladu selekciju koja će braniti boje Bosne i Hercegovine na susretima:

Ragbi 15: 11.04.2026. Bosna i Hercegovina - RgK Zagreb (BiH, Zenica); 09.05.2026. Slovenija - Bosna i Hercegovina (Slovenija, Ljubljana); maj 2026 TBC Bosna i Hercegovina - Hrvatska (BiH Zenica).



Ragbi 7: 17-19.07.2026. Europsko prvenstvo u ragbiju 7 U18 (Trophy II grupa) Andora.

Radujemo se uspjehu naših mladih ragbijaša.

RAGBI SAVEZ BIH | PROJEKT RAGBIONICE



Ragbi savez BiH u suradnji sa Filozofskim fakultetom Univerziteta u Zenici, Odsjekom za tjelesni odgoj i sport i JU za predškolski odgoj i obrazovanje pokrenula je projekt Ragbionice.

Naime, u pet odabranih predškolskih ustanova studenti starijih godina studija Odsjeka za tjelesni odgoj i sport sprovode sportske radionice za članove predškolskih grupa. Projekat je osmišljen kao dio širih promotivnih aktivnosti Rising Rugby Play sa ciljem promocije sportskih i zdravih

životnih navika. Pilot projekat je za sada u pet predškolskih ustanova u Gradu Zenica. Studenti kroz pomno pripremljen plan i mentorstvo profesora Stanković Alekse stižu kompetencije i znanja a "mala raja" uživa u sportskim radionicama tj. ragbionicama jednom sedmično.

RAGBI SAVEZ BIH | SNIMANJE DOKUMENTARNOG FILMA O RAGBIJU U BIH



Dana 25.02.2026. godine počelo je snimanje dokumentarnog filma o ragbiju u BiH u produkciji Dokumentarno-savremenog programa BHRT-a. Ekipu koja se odvažila na ovaj korak čine snimatelji Sanjin Mujanović i Viktor Divjak, ton Nedim Muminović i rasvjeta Elvedin Hamzić i urednik Anadin Butković.

Ovaj 'pisani' trag bit će svjedok jednog perioda ragbi sporta u Bosni i Hercegovini te ostaviti izuzetan kulturološki trag za buduće generacije. Obuhvatit će tri vremenske epohe (prošlost, sadašnjost i planove za budućnost). Veliki broj govornika i učesnika će u budućem periodu dati svoje izjave, komentare i sjećanja koji će se koristiti za potrebe dokumentarnog filma.

SKIJAŠKI SAVEZ BIH | MEĐUNARODNA FIS TRKA | SRC DVORIŠTA



U periodu od 14. do 18. januara, na stazama SRC Dvorišta na Jahorini, u okviru zimskog kalendara nordijskog trčanja, održana je međunarodna FIS trka u disciplinama slobodni stil.

Takmičenje je okupilo 120 takmičara iz šest zemalja, u seniorskim, juniorskim i dječijim kategorijama. Boje reprezentacije Bosne i Hercegovine branili su članovi NSK „Romanija“ i SK „Sarajevo–Istočno Sarajevo“, koji su ostvarili zapažene rezultate.

Osim sportskih uspjeha, tehnički organizatori – NSK „Romanija“ i SK „Sarajevo–Istočno Sarajevo“ – još jednom su potvrdili da su vrhunski domaćini, spremni i odgovorni za organizaciju značajnih međunarodnih takmičenja.

NA BJELAŠNICI ODRŽANA PRVA INKLUZIVNA SKIJAŠKA UTRKA „SKIING4ALL SARAJEVO 2026“



Ski klub osoba sa invaliditetom „Sarajevo“ organizovao je prvu inkluzivnu skijašku utrku „Skiing4all Sarajevo 2026“ na kojoj su se okupili paraolimpijci, ambasadori, članovi Specijalne olimpijade, kao i brojni sportisti i novinari na olimpijskoj planini Bjelašnici.

Ova manifestacija počela je 30.01. u Olimpijskom muzeju u kojem su promovisani dosadašnji rezultati u okviru ERASMUS+ projekta „Cooperation Sport4all“ kojeg Ski klub osoba sa invaliditetom „Sarajevo“ realizuje zajedno sa organizacijom BRAVO, te partnerskim organizacijama iz Bugarske, Srbije i Crne Gore. Dan adaptivnog skijanja obilježen je kroz demonstracije skijanja osoba sa senzornim oštećenjima (slijepi i slabovidni), amputacijama, te djece sa intelektualnim teškoćama i oštećenjima sluha, dok je u nedjelju održana utrka na kojoj su po prvi put zajedno nastupili paraolimpijci, osobe sa najtežim oblicima fizičkog onemogućenja i invalidnosti, slijepi i slabovidne osobe, amputirci, članovi Specijalne olimpijade BiH, a sa druge strane staze, istovremeno tipične osobe. Simbolično jedni protiv drugih, bez rezultatskog značaja i sa samo jednim ciljem, sport za sve ili skijanje za sve kako se prva inkluzivna utrka i zvala. Kompletnu vijest pročitajte na linku [OVDJE](#).

SAVEZ SPECIJALNE OLIMPIJADE BIH | REPREZENTACIJA BOSNE I HERCEGOVINE OSVAJA ZLATA NA 4. ZIMSKIM IGRAMA EMIL OPEN



Specijalna olimpijada Bosne i Hercegovine svojim učešćem na međunarodnom sportskom događaju 4th V4 Winter Games – Emil Open, koji se održao u periodu od 21. do 25. januara 2026. godine u Češkoj Republici, iznova je pokazala spremnost nizajući medalje!

Riječ je o međunarodnim zimskim igrama namijenjenim djeci i mladima sa svim vrstama invaliditeta, uzrasta od 10 do 26 godina, koje se ove godine održavaju po četvrti put. Takmičenje okuplja više od 250 učesnika iz sedam evropskih zemalja: Albanije, Češke Republike, Srbije, Bosne i Hercegovine, Mađarske, Poljske i Slovačke, s ciljem promocije inkluzije, ravnopravnosti i prava na bavljenje sportom za sve. Reprezentacija BiH osvojila je 6 zlatnih i 2 srebrene medalje: skijaško trčanje Njegoš Mihajlović, srebro (1 km) i srebro (3 km), Amina Halilović – zlato (500 m); hodanje na krpljama 500 m, Amel Šodić – zlato, Emir Tabaković – zlato, Fahro Čorbadžić – zlato; para alpsko skijanje, veleslalom Edna Šunjić – zlato, Harun Tanović – zlato.

SPECIJALNA OLIMPIJADA BIH ZAPOČELA REALIZACIJU ERASMUS+ SPORT PROJEKTA „ORIEDOWN“

Napore u ostvarivanju inkluzivnog okruženja, te pružanju jednakih mogućnosti za osobe sa intelektualnim poteškoćama u razvoju, kao krovna organizacija u Bosni i Hercegovini, Specijalna olimpijada svakodnevno dokazuje svojim projektima i naporima. Korak naprijed u ostvarivanju ovog cilja je zasigurno realizacija međunarodnog projekta ERASMUS-SPORT-2025 pod nazivom „OriEDown“, usmjerenog na unapređenje inkluzivnog sporta i stvaranje novih mogućnosti za osobe s intelektualnim teškoćama.

Prvi zvanični sastanak projektnih partnera održan je u periodu od 4. do 7. februara 2026. godine u gradu Malatya, Turska, čime je započeta konkretna implementacija projektnih aktivnosti.

Poseban fokus stavljen je na:

- jačanje kapaciteta organizacija koje rade sa sportistima s intelektualnim teškoćama;
- razvoj novih inkluzivnih sportskih pristupa;
- promociju jednakih mogućnosti kroz sport;
- umrežavanje organizacija na evropskom nivou.



Projekat će trajati 18 mjeseci i obuhvatiti će 1900 osoba, te će razviti 4 segmenta:

1. VODIČ DOBRIH PRAKSI
2. PRILAGOĐENE ORIJENTIRING MAPE
3. EDUKATIVNE VIDEO-IGRE ORIJENTIRINGA
4. PILOT AKTIVNOSTI ORIJENTIRINGA KROZ SPORTSKA TAKMIČENJA

Učešće Specijalne olimpijade BiH u projektu „OrieDown“ predstavlja još jedan važan korak ka jačanju međunarodne saradnje i razvoju kvalitetnijih sportskih programa za naše sportiste.

Koordinator projekta je organizacija Factor Fuerza iz Španije, a u projektu učestvuju partneri iz čak šest evropskih zemalja:

- Kapsayici Spor Toplulugu Spor Kulubu – Turska
- Thessaloniki Olympic Museum – Grčka
- Županijska udruga osoba s cerebralnom i dječijom paralizom – Hrvatska
- ATERMON BV – Nizozemska
- Specialais Sporta Centrs – Latvija
- Specijalna olimpijada Bosne i Hercegovine

Kao pridruženi partner uključen je i klub Dogansehir Dag ve Doga Spornari Kulubu Dernegi iz Turske.

ODRŽANA PRVA VELIKA KONVENCIJA TRENERA U SJEDEĆOJ ODBOJCI ODRŽANA U SARAJEVU



Prva velika međunarodna konvencija trenera u sjedećoj odbojci organizovana od strane ParaVolley Europe uz podršku World Paravolley, uz tehničku organizaciju Saveza sjedeće odbojke Bosne i Hercegovine, održana je u Sarajevu.

Konvencija je okupila 60 učesnika iz 25 zemalja, s ciljem jačanja saradnje, razmjene znanja i unapređenja sjedeće odbojke kao inkluzivnog sporta u Evropi.

Ovaj događaj predstavlja pionirski skup takve vrste u sjedećoj odbojci i važnu prekretnicu u razvoju sporta za osobe s invaliditetom na evropskom nivou.

Tokom konvencije učesnici su imali priliku učestvovati u edukativnim programima, praktičnim radionicama i strateškim diskusijama usmjerenim na razvoj trenerskih kapaciteta, umrežavanje i unapređenje sportskih struktura u svojim zemljama. Sarajevo je ovim događajem dodatno potvrdilo svoju ulogu domaćina međunarodnih sportskih inicijativa, čime se nastavlja jačanje regionalne i međunarodne saradnje u paraolimpijskim sportovima.

Jedan od mentora na konvenciji bio je selektor reprezentacije Bosne i Hercegovine u sjedećoj odbojci Ifet Mahmutović, a osim njega mentori su bili Robin van de Haan iz Holandije i Massimo Beretta iz Italije.

Poseban momenat događaja bio je dolazak reprezentacije Bosne i Hercegovine u sjedećoj odbojci, kada su brojni učesnici imali priliku iz prve ruke posmatrati višestruke osvajače olimpijskih, svjetskih i evropskih medalja, a u jednom trenutku i priključiti se trening-utakmici zajedno s njima. Konvenciji su prisustvovali i predsjednik World ParaVolleya Jürgen Schrapp iz Njemačke, te predsjednik ParaVolley Europe Branko Mihorko iz Slovenije. Jedna od tema razgovora s domaćinima bila je i organizacija Evropskog prvenstva u sjedećoj odbojci, koje je zakazano za 2029. godinu u Sarajevu.

BH • TEAM

DVIJE BRONZE ZA BIH NA EVROPSKOM PRVENSTVU U STRELJAŠTVU



Na Evropskom prvenstvu u streljaštvu u Burgasu reprezentacija Bosne i Hercegovine ostvarila je rezultat za pamćenje - osvojene su dvije medalje u omladinskim kategorijama.

Prvu evropsku ekipnu medalju za BiH u kategoriji U16 (djevojke) osvojile su:

- Ina Gačić — Streljački klub Belgrand (Teslić)
- Teodora Cvijan — Streljački klub Željezničar (Sarajevo)
- Larisa Mulahmetović — Streljački klub Željezničar (Sarajevo)

Nakon jakih kvalifikacija, naše djevojke su u meču za medalju protiv Rusije u dramatičnom raspucavanju pokazale izuzetnu mentalnu snagu i mirnoću te osvojile ekipnu bronzu — prvu takve vrste u istoriji bh. streljaštva.

Drugu medalju, također bronzanu, osvojili su u disciplini U18 — duet:

- Amir Memišević
- Zakira Pušina

Amir i Zakira su u kvalifikacijama ostvarili najbolji rezultat i postavili novi evropski rekord, potvrdivši tehničku stabilnost i takmičarsku zrelost. U polufinalu su izgubili od prvog para Srbije (Anastasija Živković / Mihajlo Lončarski), ali su u meču za treće mjesto zasluženno osvojili bronzu.

Dvije evropske medalje u dva dana potvrda su kvalitetnog i dugoročnog rada klubova, stručnih štabova, trenera i podrške porodica i sportskih institucija. Posebno je značajno što su medalje osvojene u najmlađim kategorijama, što ukazuje na svijetlu budućnost bh. streljaštva.

Čestitke sportistima, trenerima i svima koji su doprinijeli ovom uspjehu. Bosna i Hercegovina piše nove stranice istorije u streljaštvu.

NEZAUSTAVLJIVA LANA PUDAR



U svojoj prvoj NCAA sezoni u Sjedinjenim Američkim Državama, Lana Pudar nastavlja blistati, brzo dokazujući svoju vrijednost među najboljim američkim i univerzitetskim plivačicama.

U najnovijem dvoboju, tim University of Virginia odmjerio je snage s Virginia Tech Hokies, a Lana je ponovno ostvarila izvanredan nastup, osvojivši prvo mjesto u disciplini 200 yardi delfin s vremenom 1:55.88, doprinoseći uvjerljivoj pobjedi tima rezultatom 201:87!

Samo nekoliko dana ranije, nastupila je protiv ekipe Penn State Nittany Lions, gdje je plivala još brže sa vremenom 1:54.93 u istoj disciplini! Lana Pudar svojim rezultatima jasno pokazuje da bosanskohercegovački sport ima predstavnicu na vrhu američke sportske scene. Lana, sretno!

POBJEDA ANURA MEHIĆA

Mladi bh. skijaš Anur Mehić (16) pobijedio je na slalomskoj FIS utrci u San Vito Di Cadoreu, Italija. Sa vremenom od 1:30.27, Anur je završio prije brojnih domaćih takmičara, uključujući i drugoplasiranog Stefana Caldarta.

Ovaj uspjeh donosi mu 44,08 FIS bodova i nema sumnje da će nastaviti s odličnim rezultatima!

Čestitke za Anura, njegov tim i Skijaški savez BiH!



EMEL LJUBUŠKIĆ MEĐU 50 NAJBOLJIH JUNIORA SVIJETA



Emel, jedan od najperspektivnijih biciklista BiH, trenutno je 48. na svjetskoj UCI listi juniora! Osvajač šest titula državnog prvaka, a ovog puta se posebno istakao s drugim mjestom na Serba Epic UCI C2.

Njegov trener, Amar Njemčević, naglašava disciplinovanost i rad, a Emel se sprema za Balkansko prvenstvo i niz UCI takmičenja!

Emele, sretno!

MUJEZINOVIĆ ZLATNI NA PRVENSTVU BALKANA U DISCIPLINI 800 M



Abedin Mujezinović je osvojio zlatnu medalju na Balkanskom prvenstvu koje je održano u Beogradu. Sjajna taktika, borbenost i snažan finiš donijeli su zasluženno prvo mjesto za našeg atletičara Abedina Mujezinovića.

Ovaj rezultat potvrđuje njegov kvalitet, kontinuitet napretka i ponos za tim i Bosnu i Hercegovinu.

Inspiracija mladim sportistima, dokaz da predanim radom, disciplinom i vjerom u sebe sve je moguće. Čestitke!

TARIK OMERAGIĆ POSTAVIO NOVI LIČNI REKORD



Najbolji bosanskohercegovački brzoklizač, Tarik Omeragić, bio je odličan na Evropskom seniorskom prvenstvu u brzom klizanju u Tilburgu (16 -18. januar).

Postavio je novi lični rekord na 1500 metara s vremenom 2:15.413, što ga svrstava među najbolje brzoklizače u Evropi!

Na 500 metara osvojio je 29. mjesto, a na 1000 metara 30. mjesto.

Pripreme za Svjetsko prvenstvo u Montrealu (mart) se nastavljaju! Sretno, Tarik.

EUROPSKI JUNIORSKI JUDO KUP SARAJEVO



Na Evropskom juniorskom kupu u Sarajevu nastupila je 21 nacionalna reprezentacija s ukupno 303 natjecatelja, dok je reprezentaciju Bosne i Hercegovine predstavljalo 27 muških i 11 ženskih sportaša.

U izuzetno zahtjevnoj konkurenciji najboljih evropskih juniora, reprezentacija Bosne i Hercegovine ostvarila je zapažen i međunarodno relevantan rezultat, pri čemu je posebno važno naglasiti da su sve medalje za Bosnu i Hercegovinu osvojili članovi Judo kluba Bursa iz Mostara.


Osvajači medalja za reprezentaciju Bosne i Hercegovine:

- Rino Vrljić (BiH) – brončana medalja, kategorija +100 kg
- Korina Džidić (BiH) – zlatna medalja, kategorija –78 kg
- Johanna Elisabeth Klinger (BiH) – brončana medalja, kategorija –78 kg

Ovim rezultatima članovi Judo kluba Bursa osvajači medalja za reprezentaciju Bosne i Hercegovine na Evropskom juniorskom kupu u snažnoj evropskoj konkurenciji dostojno su i uspješno predstavili boje domovine Bosne i Hercegovine.

Rezultati ostvareni na Evropskom juniorskom kupu u Sarajevu predstavljaju značajan međunarodni uspjeh reprezentacije Bosne i Hercegovine, potvrđujući kontinuitet sustavnog rada Judo saveza BiH i pridruženih klubova, te sposobnost ravnopravnog nadmetanja s najjačim evropskim judo reprezentacijama.

SENIORSKI JUDO AFRICAN OPEN CASABLANCA - BODOVNI TURNIR ZA OLIMPIJSKE IGRE



Na seniorskom African Openu Casablanca, bodovnom turniru iz službenog kalendara Međunarodne judo federacije (IJF), reprezentativci Bosne i Hercegovine ostvarili su zapažen rezultat u okviru olimpijskog kvalifikacijskog ciklusa.

Natjecanje je okupilo 325 natjecatelja iz 42 države s 5 kontinenata, a rezultati ostvareni na ovom turniru boduju se za IJF olimpijsku rang-ljestvicu. Reprezentacija Bosne i Hercegovine završila je natjecanje na visokom 5. mjestu u ukupnom poretku, pri čemu su osvojene četiri medalje, što predstavlja značajan doprinos početku olimpijskog ciklusa.

KORINA DŽIDIĆ – Judo klub Borska (BiH) – ZLATNA MEDALJA u kategoriji do 78
JOHANNA ELISABETH KLINGER – Judo klub Borska (BiH) – BRONČANA MEDALJA
MUSTAFA HEBIB – Judo klub ON1, Sarajevo (BiH) – BRONČANA MEDALJA
RINO VRLJIĆ – Judo klub Borska (BiH) – BRONČANA MEDALJA

Rezultati ostvareni na seniorskom African Openu u Casablanci potvrđuju konkurentnost reprezentacije Bosne i Hercegovine na međunarodnoj seniorskoj razini te predstavljaju važan korak u olimpijskom kvalifikacijskom ciklusu.



EVROPA JUDO KUP ZA KADETE ŠAMORIN

Nikola Lubura je osvojio drugo mjesto i srebrnu medalju u kategoriji +90 kilograma na Europskom kupu za kadete, koje se održalo u Šamorinu - Slovačka 14. i 15.02.2026. godine.

Ovim rezultatom Nikola je zadržao izvanredno 6. mjesto na Svjetskoj ranking listi za kadete, te je pokazao zavidnu formu za predstojeća takmičenja.

SAMBO - DVA BORCA, DVIJE MEDALJE, EUROPSKA SENZACIJA



Reprezentacija Bosne i Hercegovine ostvarila je izvanredan uspjeh na Europskom SAMBO kupu za seniore, održanom u Dubrovniku, osvojivši dvije medalje u izuzetno jakoj međunarodnoj konkurenciji.

Zlatnu medalju u seniorskoj konkurenciji do 88 kilograma osvojio je Srđan Ajvaz, dominirajući u najbrojnijoj i jednoj od najzahtjevnijih kategorija turnira. Njegov nastup ocijenjen je kao jedan od najkvalitetnijih na cijelom natjecanju, čime je još jednom potvrdio svoj status među elitom europskog SAMBO-a.


Još jedan sjajan rezultat za Bosnu i Hercegovinu ostvario je Filip Križanac, koji je u kategoriji do 71 kilogram osvojio srebrnu medalju, doprinijevši ukupnom ekipnom uspjehu reprezentacije.

Bh. sambo reprezentaciju na ovom natjecanju predvodio je selektor Majo Češko, a ovaj rezultat ima poseban značaj jer je BiH bila sa samo dva natjecatelja koja je osvojila dvije medalje, a pobjedničko postolje obilježila je i intonacija državne himne. Na Europskom SAMBO kupu sudjelovali su natjecatelji iz Njemačke, Francuske, Srbije, Italije, Moldavije, Izraela, Cipra, Grčke, Bugarske, Švicarske, Sjeverne Makedonije, Belgije, Bosne i Hercegovine i Hrvatske, što ovom uspjehu daje dodatnu sportsku i međunarodnu težinu.

Ovaj rezultat predstavlja snažnu potvrdu kontinuiranog napretka bh. SAMBA te jasan pokazatelj da se BiH ravnopravno nosi s najjačim europskim reprezentacijama.

EU PROJEKTI

PRVA GODINA IMPLEMENTACIJE PROJEKTA SAFE HARBOUR



Projekat SAFE HARBOUR uspješno je završio svoju prvu godinu implementacije, koju je obilježila snažna saradnja, razmjena iskustava među partnerima projekta.

Ključna prekretnica postignuta je u decembru 2025. godine podnošenjem Izvještaja o kapacitetima partnera projekta u kontekstu zaštite sportista, dokument pruža procjenu zasnovanu na podacima o zaštitnim strukturama, procedurama i mehanizmima odgovora u međunarodnim sportskim savezima i

evropskim nacionalnim olimpijskim komitetima.

Rezultati potvrđuju i ohrabrujući napredak i uporne izazove, čime se uspostavlja čvrsta baza za sljedeću fazu projekta, usmjerenu na zajedničku izradu evropskog okvira za odgovor na nasilje u sportu, kao i na razvoj i implementaciju nacionalnih strategija. Interes evropskih nacionalnih olimpijskih komiteta koji se pridružuju projektu kao "posmatrači" dodatno jača njegovu važnost i evropsku dimenziju, istovremeno jačajući Evropsku mrežu za siguran sport i temelje za budući centar Međunarodnog olimpijskog komiteta za siguran sport u Evropi.

GAP REPORT MOŽETE PROČITATI NA LINKU [OVDJE](#).

WELEAD PROJEKAT

WELEAD projekat radi na povećanju učešća žena u vodećim ulogama u baznim sportovima u Bosni i Hercegovini i Crnoj Gori, u saradnji s partnerima iz Italije i Austrije.

Kroz ovaj projekt želimo:

- Ojačati institucionalni kapacitet za podršku ženama u liderstvu
- Razviti inkluzivne sportske programe prilagođene potrebama žena
- Osposobiti nezaposlene žene za menadžment u sportu i leaderske vještine
- Podići svijest o ključnoj ulozi žena u baznim sportovima

Zajedno gradimo inkluzivnije i održivije sportsko okruženje širom Evrope.

Co-funded by the European Union

CILJEVI PROJEKTA

- Jačanje kapaciteta zemalja koje nisu pridružene Programu za provedbu zajedničke metode povećanja učestvovanja žena na liderskim pozicijama kroz saradnju s partnerima iz zemalja EU Programa.
- Razvijanje novih kompetencija kod trenera usmjerenih na razvoj novih sportskih programa prilagođenih potrebama učestvovanja žena.
- Unapređenje znanja i vještina iz oblasti sportskog menadžmenta i liderstva namijenjeno nezaposlenim ženama.
- Podizanje svijesti među sportskim klubovima i institucijama o ulozi žena na razini amaterskog (baznog) sporta.

Project Partners

Logos: CSIT, ICS, UCG, WBSlab, Olimpijski komitet Bosne i Hercegovine

OK BIH NA KICK-OFF SASTANKU STRONG PROJEKTA U BRISELU



Predstavnici Olimpijskog komiteta Bosne i Hercegovine učestvovali su na dvodnevnom kick-off sastanku novog Erasmus+ projekta STRONG (Supporting the Implementation of Athletes' Rights & Responsibilities) koji je održan u Briselu, u organizaciji EOC EU Office.

STRONG je evropska inicijativa usmjerena na jačanje prava i odgovornosti sportaša unutar nacionalnih olimpijskih komiteta. Projekat okuplja 15 NOC-ova iz Europe, akademske partnere i stručnjake kako bi se unaprijedili standardi zaštite sportaša, razvile nove smjernice, te osnažile organizacije i sportaši kroz edukaciju i razmjenu dobrih praksi.

Učešće OK BiH u ovom projektu predstavlja važan korak ka unapređenju sportskog sistema u Bosni i Hercegovini, posebno u segmentima dobrog upravljanja, sporta zasnovanog na vrijednostima i stvaranja sigurnog, inkluzivnog okruženja za sve sportaše.

Ponosni smo što doprinosimo evropskoj sportskoj zajednici i radujemo se zajedničkom radu u naredne dvije godine trajanja projekta.

Projekat je sufinansiran od strane Evropske unije.



INTERVJU MARKO ŠLJIVIĆ

OK BiH: *Marko, još jednom ti čestitamo na izuzetnim nastupima i istorijskom uspjehu u muškoj konkurenciji slalom discipline alpskog skijanja koji si postigao na nedavno završenim ZOI Milano Cortina 2026. Možeš li nam reći kako se osjećaš nakon postignutog uspjeha i kakvo je iskustvo učestvovati na Zimskim olimpijskim igrama?*

MARKO ŠLJIVIĆ: Hvala vam puno na čestitkama. Osjećaj nakon ostvarenog rezultata na Zimskim olimpijskim igrama Milano–Cortina 2026 je zaista poseban i teško ga je opisati riječima. Pored teške staze i otežanih vremenskih uslova bio je izazov uopšte završiti prvu vožnju u slalomu. Tako da sam tek u drugoj vožnji imao priliku za dobar nastup. Iza ovog rezultata stoji mnogo godina rada, odricanja i treninga, tako da je velika čast i zadovoljstvo predstavljati svoju zemlju na ovako velikom takmičenju. Učešće na Olimpijskim igrama je jedinstveno iskustvo. Atmosfera, organizacija i prilika da budem među najboljim sportistima svijeta su nešto što se pamti cijeli život. Izdvojio bih samo jednu stavku koja mi se nije u potpunosti dopala, a to je organizacija Olimpijade u više Olimpijskih sela, što je doprinijelo tome da je izostao osjećaj pravog olimpijskog duha.

OK BiH: *Da se vratimo na same početke - kada si počeo da treniraš alpsko skijanje i kako si se zaljubio u ovaj sport?*

MŠ: Ljubav prema alpskom skijanju prenio mi je otac koji je cijeli svoj život posvetio skijanju. Prvi put sam stao na skije sa 3 godine, a već sa 5 sam počeo trenirati i do danas nisam odustajao.

OK BiH: *Ko su ti bili najveći uzori i podrška u početnim godinama karijere?*

MŠ: Najveća podrška mi je bio svakako otac kao i cijela porodica. Ali ne smijem izostaviti da sam kroz svoju karijeru radio sa mnogim trenerima i zahvalan sam svima koji su dali svoj doprinos.

OK BiH: *Koji su najveći izazovi s kojima si se susretao na putu do vrhunskog sportiste?*

MŠ: Najveći izazovi su odricanja koja skijaš treba da prihvati jer sam većinu vremena provodio daleko od porodice i prijatelja. U mnogim sportovima uslove tokom cijele godine je moguće pronaći u našoj državi, ali alpsko skijanje je specifično jer bez obzira koliko dobre skijaške centre imamo u prosjeku bude 100 skijaških dana, tako da za ostalih 260 moramo ići na glečere u Evropi ili u južnu hemisferu.



Photo by Cameron Spencer / Getty Images

OK BiH: *Kakvi su tvoji kratkoročni ciljevi nakon ZOI 2026 i da li već razmišljaš o narednim Igrama?*

MŠ: Trenutno je plan završiti sezonu sa što boljim rezultatima, odnosno da pokušam spustiti FIS bodove kako bih bio što bolje rangiran na svjetskoj rang listi. Četiri godine je dug period, ima tu još svjetskih prvenstava i ko zna koliko takmičenja. Između ostalog dolaze mladi perspektivni takmičari i neće uopšte biti lako izboriti mjesto za naredne Olimpijske igre. Nadam se da će se još podići nivo skijanja da otvorimo i dodatne kvote kao što je i Elvedina uradila.

OK BiH: *Za kraj, kaži nam koji je tvoj sportski moto i koja je tvoja poruka mladim u Bosni i Hercegovini?*

MŠ: Moja poruka je da mladi trebaju uživati u onome što rade, da im ne bude sport obaveza ili teret nego da to gledaju kao sastavni dio života. Prilika će doći svakome, samo je pitanje hoće li biti tu u pravo vrijeme da je pokupi.

OK BiH: *Hvala Marko, želimo ti puno sreće i uspjeha u nastavku sportske karijere!*



Photo by Dustin Satloff / Getty Images

ZAVIRITE U DRUŠTVENE MREŽE OK BIH (klikom na sliku)




📖 edukaciju i obuku trenera
🏠 jačanje strukture nacionalnih olimpijskih komiteta

Ovaj fond omogućava da se olimpijski ideali šire globalno 🌐 i doprinosi smanjenju nejednakosti u pristupu sportu – jer sport treba biti dostupan svima. ❤️

Olympics

#OlympicSolidarity #MOK #OlympicValues #SportForAll



Pratite nas na društvenim mrežama:
(klikom na ikone)



©2026. Olimpijski komitet Bosne i Hercegovine.
Sva prava zadržana.
www.okbih.ba

Specijalnu zahvalnost dugujemo sponzorima i partnerima OK BiH.
Klikom na logo posjetite njihove oficijelne stranice.



Moja priča.

